

第六三二冊

理學彙編

文學典

文學名家列傳

文學總部

(卷)

二五—二六

二九—三〇

古今圖書集成

中華書局影印

欽定古今圖書集成理學彙編文學典

第一百十五卷目錄

文學名家列傳一百三

明二十五

曹學佺

陳仁錫

張溥

湯賓尹

范允臨

鄧漢

龔士驥

任憲

費尚伊

何喬遠

宗名世

劉策

俞琬綸

來復

舒曰敬

王象春

王志堅

艾南英

曾異撰

侯恪

吳震元

葉憲祖

何白

朱珏

秦鍾震

陳懿典

阮自華

俞彥

陳元素

王嗣夷

陸寶

文學典第一百十五卷

文學名家列傳一百三

明二十五

曹學佺

按明外史本傳學佺字能始侯官人弱冠舉萬曆二十三年進士授戶部主事申察典調南京添注大理左寺正居冗散七年肆力於學累遷南京戶部郎中四川右叅政按察使蜀府燬於火估修資七十萬金學佺以宗藩條例却之又中察典議調天啓二年起廣西右叅議初挺擊獄與劉廷元輩主瘋癲學佺著野史紀略直書事本末至六年秋學佺遷陝西副使未行而廷元附魏忠賢大幸乃勸學佺私撰野史淆亂國章遂削籍燬所鑄板巡按御史王政新以嘗薦學佺亦勒閒住廣西大吏揣學佺必得重禍羈留以待已知忠賢無意殺之乃得釋還崇禎初起廣西副使力辭不就家居二十年著書所居石倉園中爲石倉十二代詩選盛行於世嘗謂二氏有藏吾儒何獨無欲修儒藏與鼎立采輯四庫書因類分輯十有餘年功未及竣兩京繼覆唐王立於閩中起授太常卿尋遷禮部右侍郎兼侍講學士進尚書加太子太保及事敗走入山中投繯而死年七十有四詩文甚富總名石倉集閩中文風明初爲盛至萬曆中再盛自學佺倡之晚年更以殉節著云

按列朝詩集學佺字能始侯官人萬曆乙未進士除戶部主事量移南大理寺正凡七年兩考轉南戶部郎前後十二年叅議於蜀叅政按察使於浙左遷右叅議副使於廣西天啓中除名爲民崇禎初復起廣

西疏辭不起家居二十餘年殉節而死年七十有四能始美秀而文安雅有遺節新建相爲座師以備選待能始能始弗往新建罷相門人故吏莫敢往視能始爲部郎追送舟次爲肥車馬糧糗言官落之故有南評之謫光宗在東朝有挺擊之案能始有所撰述直書其顛末逆奄用事學佺立三案劾魏忠賢始所撰爲詩書除名爲民詔賤其鐵板當是時能始在廣西大吏爭希奄指囑留以待命知奄無意殺之而出能始具勝情愛名山水卜築匡山之下將攜家往居不果家有石倉園水木佳勝賓友欽集聲伎雜進享詩酒談讌之樂近世所罕有也著述頗富如海內名勝志十二代詩選皆盛行於世嘗謂二氏有藏吾儒無藏欲修儒藏與之鼎立採輯四庫之書十有餘年而未卒業也爲詩以清麗爲宗程孟陽苦愛其送梅子庚明月自佳色秋鐘多遠聲之句其後所至各有集自謂以年而異其佳境要不出於此而入蜀以後判年爲一集者才力漸放應酬日煩率易冗長都無持擇并其少年面目取次失之少陵有言晚節漸於詩律細有旨哉其言之也

王志堅

按明外史本傳志堅字弱生崑山人父臨亭進士杭州知府志堅舉萬曆三十八年進士授南京兵部主事歷員外郎郎中暇日要同舍郎爲讀史社撰讀史商語遷貴州提學僉事不赴乞侍養歸天啓二年起督浙江驛傳奔母喪歸崇禎四年復以僉事督湖廣學政禮部推爲學政第一六年卒於官志堅少與李流芳同學爲詩文法唐宋名家通籍後卜居吳門古

南園杜門却掃肆志讀書先經後史先史後子集其讀經先箋疏而後辨論讀史先證據而後發明讀子則謂唐宋而後無子當取說家之有裨經史者補之讀集則定秦漢以後古文為五編考覈唐宋碑志援史傳摭雜說以參覈其事之同異文之純駁其於內典亦深辨性相之宗作詩甚富自選止七十餘首弟志長字平仲舉於鄉亦深於經學

陳仁錫

按明外史本傳仁錫字明卿長洲人父允堅進士歷知諸暨崇德二縣仁錫年十九舉萬曆二十五年鄉試聞武進錢一本善易仕師之得其指要久不第益究心經史之學多所論著天啓二年以殿試第三人授翰林編修時第一為文震孟亦老成宿學海內咸慶得人明年丁內艱廬墓次服闋起故官尋直經筵典誥勅魏忠賢冒邊功矯旨錫上公爵給世券仁錫當視草持不可其黨以威劫之毅然曰世自有視草者何必我忠賢聞之怒不數日里人孫文牙以誦步天歌見捕坐妖言獄錄成獄詞連仁錫及震孟罪將不測有密救者得削籍歸崇禎改元召復故官旋進右中允署國子司業事再直經筵每進講多指陳時弊以預修神光二朝實錄進右諭德乞假歸越三年即家起南京國子祭酒甫拜命得疾卒福王時贈詹事諡文莊仁錫講求經濟有志天下事性好學喜著書一時閣中博洽者鮮其儔云

艾南英

字世範

羅南人

按明外史本傳南英字千子東鄉人七歲作竹林七賢論長為諸生好學無所不覓萬曆末場屋文腐爛

南英深疾之與同郡章世純羅萬藻陳際泰以典起斯文為任乃刻四人所作行之世世人翕然歸之稱為章羅陳艾天啓四年南英始舉於鄉座主檢討丁乾學給事中郝士膏發策詆魏忠賢南英對策亦有諷刺語忠賢怒劾考官籍南英亦停三科居四年莊烈帝即位詔許會試久之卒不第而文日有名負氣凌物人多畏而惡之素所交亦多憚其口始王李之學大行天下談古文者悉宗之後鍾譚出而一變至是錢謙益負重名於詞林痛相糾駁南英和之於下排詆王李不遺餘力南京繼覆江西郡縣盡失南英乃入閩唐王召見陳十可受疏授兵部主事尋改御史明年八月卒於延平世純字大力臨川人博聞強記舉天啓元年鄉試崇禎中累官柳州知府年已七十矣聞京師變悲憤遺疾卒萬藻字文止世純同縣人天啓七年舉於鄉崇禎中行保舉法祭酒倪元璐以萬藻應詔辭不就福王時為上杭知縣唐王立於閩擢禮部主事南英卒哭而殯之居數月亦卒際泰字大士亦臨川人父流寓汀州武平生於其地家貧不能從師又無書時取旁舍兒書屏人竊誦從外兄所獲書經四角已漫滅且無句讀自以意識別之遂通其義十歲於外家藥籠中見詩經取而疾走父見之怒督往田則攜至田所踞高阜而哦遂畢身不忘久之返臨川與南英輩以時文名天下其為文敏甚一日可二十首先後所作至萬首經生舉業之富無若際泰者崇禎三年舉於鄉又四年成進士年六十有八矣又三年除行人居四年謫故相蔡國用喪南行卒於道

按江西通志南英字千子天啓甲子舉人七歲作竹林七賢論者碩翁然稱之病制科樸蕪之習辭而闕之為定待二書經義不廢此其金科玉律也尤究心史學冥搜博覽為古今全史千餘卷編集甫竟遭罹兵燹與他著述俱散佚僅存天儲子集行於世按江西通志世純字大力臨川人天啓辛酉舉人嘗病宋儒訓詁於事理兩無所據探究經傳務攻堅伐異以明聖賢立言之旨所著已未雷及章子雷書理解精微造語元偶凡天文律曆以至五行禽遁陰陽星卜之言一見即能剖其元微摘其疵謬京郭以下蔑如也授翰林孔目有旨召對以語音期吃辭條上兵事極言禁旅邊鎮及召募客兵之弊謂不如重州郡之權使之自將其人自用其餉賊可盡也不省出為柳州知府卒於粵按江西通志萬藻字文止臨川人天啓丁卯舉人為文堅潔深秀與大士千子大力主文章之柄者四十餘年海內稱為四先生常憤邊事潰散著本守議數千言大略言今天下文武乖方內事殊適磨牙厲吻惟苞苴門戶之死守不移一體之中痛癢既不自知騷抑亦無其具惟有坐以共斃而已崇禎己卯倪元璐以賢良方正薦有旨特用不赴授上杭令所存有小千園集按江西通志際泰字大士臨川人崇禎甲戌會試第二授行人典試貴州都城戒嚴兼程赴闕拜十疏言事畱中不報庚辰奉使道卒泰儀儀觀善談論篤於孝友好獎進人材以古學變時文迂謬之習門生友入與之狎處者十三經二十一史無從說起之書略

約盡畢其語兵形扼塞費河水利諸用世之務目規手畫鑿鑿可見施行晚受一官不竟其用天下惜之所著有四書讀五經讀易正義太乙山房集已吾集皆行於世子孝威孝逸並知名

張溥 張采

按明外史本傳溥字天如太倉人伯父輔之南京工部尚書溥幼嗜學所讀書必手鈔鈔已朗誦一遍即焚之又鈔如是者六七始已右手握管處指掌成繭數日輒割去冬月手皸日沃湯數次後名讀書之齋曰七錄以此也為諸生招同里張采共學益肆力經史名籍甚號東二張崇禎元年以選貢生入都采方成進士兩人名徹都下已而采官臨川溥歸集郡中名士相與復古學名其文社曰復社四年成進士改庶吉士以葬親乞假歸讀書若經生無間寒暑四方噉名者爭走其門盡名為復社溥亦領身結納交游日廣聲氣通朝右所品題甲乙頗能為榮辱大吏多承其譽欲諸奔走附麗者輒自矜曰吾以嗣東林也執政大僚由此惡之里人陸文聲者輪賞為監生求入社不許采又嘗以事扶之文聲詣闕言風俗之弊皆原於士子溥采為主盟倡復社亂天下溫體仁方枋國下其事於提學御史倪元珙元珙移兵備參議馮元慶元慶下太倉知州周仲璉遷延久之言復社無可罪三人皆貶斥嚴旨窮究不已閩人周之夔者嘗為蘇州推官坐事罷去疑溥為之恨其間文聲訐溥遂伏闕言溥等把持計典已罷職實其所為因及復社恣橫狀章下巡撫張國維等言之變去官無預溥事亦被旨譴議至十四年溥已卒而事猶未竟

刑部侍郎蔡奕琛坐黨薛國觀繫獄未知溥卒也訐溥遂握朝柄已罪由溥因言采結黨亂政詔責溥采回奏采上言復社非臣事然臣與溥生平相淬礪死避網羅負義圖全諒不出此念溥日夜解經論文矢心報稱未會一日服官懷忠入地即今嚴綸之下井不得泣血自明良足哀悼當是時體仁已前罷繼者張至發薛國觀皆不喜東林故所司不敢覆奏及是至發國觀亦相繼罷而周延儒當國溥座主也其後再相溥有力焉故采疏上事即得解明年御史劉熙祚給事中姜燠交章言溥砥行博聞所纂述經史有功聖學宜取備乙夜觀因薦采學行帝御講筵問及二人延儒對曰讀書好秀才帝曰溥已卒采小臣言官何為薦之延儒曰二人好讀書能文章言官為舉子時讀其文又以其用未竟故惜之耳帝曰亦未免偏延儒言誠如聖諭溥與黃道周皆偏因善讀書以故惜之者衆帝領之遂有詔徵溥遺書而道周亦復官有司先後錄上三千餘卷帝悉覽溥詩文敏捷四方徵索者率不起草對客揮毫俄頃立就以故名高一時卒時年止四十采字受先與溥善溥性寬泛交博愛采特嚴毅喜甄別可否人有過嘗面叱之知臨川摧強扶弱聲大起移疾歸士民泣送載道知州劉士斗錢肅樂嚴重之以好書詢采片紙報戚置之法福王時起禮部主事進員外郎乞假去南都失守奸人素銜采者羣擊之死復用大雉亂刺之已而甦避之鄰邑又三年卒

按蘇州府志采字受先太倉人崇禎戊辰進士少敏慧弱冠後折節讀書時海內學者尚諸子張溥延米於七錄齋日夜相砥礪期以六經史漢復古學兩人先後成進士遂翕然服從采調選歸集鄉老於城隍廟誓曰自今以往幸通籍母以勢凌人母縱奴僕橫母使宗黨子弟肆里門母使私屬隸官府有渝約者共斥之風俗亦大變令臨川奉母間進肉妻子以下率烹園葵政在恤民隱繩暴必以法不少借有貴人妻黨恣邑中擒斃之豪強屏跡已移疾歸會里猾上封事指溥所立復社為朋黨列采名詔切責率連四五年溥死采獨具疏曰謂復社是臣事則出處年月不符謂復社非臣事則生同砥礪死避羅弋負義圖全臣不出此上直其言詔勿問辛巳旱蝗采請於州四門設粥廠活萬人作常平倉講鄉約立保甲法凡利民者極言不少避知州錢肅樂信采所言無不從采捐自此銜刺骨乙酉亂嘯聚數十人給采擁之去捶至死一僧伺間負采出得倖全自後東西竄伏輒北向痛哭三載卒年五十三采好善嫉惡出於天性晚事理學以程朱為宗嘗過紹興劉宗周率子弟百人聚而講學宗周極推之頒行封黃柑四枚馳數十里外為贈尤留心經濟濟子兵備馮元慶入衛京師壬午程嶠定海亂人材謀畫出采居多所著有知畏堂集太倉州志

曾異撰

按明外史本傳異撰字弗人晉江人家候官父為諸生早卒母張氏以遺腹生家甚紡績給晨夕異撰起孤董事母至孝歲餘採擷薯蕷雜糠粃食之母妻嘗負畚鋤乾草給羹然性介甚長吏知其賢欲為地不屑也久為諸生見天下多故究心經世學其所言皆

可見之行事詩有奇氣然太近詭異吳潘會絃督學政上其母節行獲旌於朝及會絃巡撫南贛得王惟儉所撰宋史招異撰及新建徐世溥更定未成而罷崇禎十二年舉鄉試年四十有九矣再赴會試還遂卒

湯賓尹

按宣城縣志賓尹字嘉賓萬曆甲午舉於鄉乙未冠南宮廷對第二授翰林編修賓尹既讀中祕書凡內外制書詔令多出其手號稱得體神宗每加獎賞尋晉中允署司業歷諭德庶子遷南京祭酒雍中考課及分闈者三所得皆當世名士好獎借人材士子質疑問難殆無虛日詞林舊例每悠游文史需次公卿間賓尹獨慷慨負氣縱談天下安危大計好刺譏人由是與時不合又以闕中爭韓敬舉首忤執政罷歸崇禎初廷臣喬若雯等疏薦未及用卒其居家孝友父嚴峻少拂意輒長跪終日色齊乃退待諸弟友愛倍常有私財輒為親故持去見負才憾軻者必推轂之不容口授以制舉業名滿天下至今無不稱湯宣城云所著有睡菴詩文集其條議防邊諸策詳文集

侯恪方輿

按河南通志恪字木菴執蒲次子萬曆己未進士改庶吉士有詩名天啓初為編修與楊漣善漣劾魏忠賢二十四大罪忠賢傳致殺之尋有言其疏屬恪起草者忠賢銜之欲置以死其黨錦衣田爾耕力為恪解且曲說恪往謝忠賢恪面斥之爾耕慙而去會時相魏廣微亦忠賢黨以恪會試分校爭宋致鄭友元

故嫉恪遂嗾御史智鉅劾罷恪崇禎改元起為庶子陞南京祭酒監中來學者數千人明典所未有也遂園詩二十卷行世子四方鎮方岳方嚴方聞皆能絕恪詩學各有板本流傳時稱平臺五鳳

范允臨

按蘇州府志允臨字長倩吳縣人文正公十七世孫惟丕子舉萬曆乙未進士授南京兵部主事改工部歷員外郎中出為雲南按察司僉事提調學政還福建布政使參議未至任而歸允臨自少才識通敏恥為章句之學盛年仕宦嘗欲以功名自効在雲南值鳳克亂臨安卒圍會城巡撫陳某任允臨以城守事時將吏列戍外地賊攻急旌旗刀槊皆不及設守墀者居民耳允臨禦之百端凡閱數晝夜城藉以完及賊遁走有以克首獻者允臨曰偽也尋生獲克於安南界上獻俘京師其露布文則出自允臨手教化三部人相讎殺上官屢論不應會城大捷允臨言交人入內地勢不得久宜會諸部併力擊遂大敗俘斬賊帥以下以數百計幕府方上功次會陳某被逮代者忌允臨遂不復錄及遷福建忌者猶不止中以考功法允臨歸而築室天平之陽日夜流連鵲味數與故人及四方知交來吳者邀遊山水間以文章翰墨倡率後進尤工法書遠近購其書者雖寸縑尺幅悉藏弄以為拱壁與華亭董其昌齊名年八十有四卒

吳震元

震元力庇之各分俸周其子母丁卯陞衡州同知改漳州翰林黃道周少所許可獨喜震元相與揭挖經史講說易象必達旦壬申海賊劉香入犯檄震元守石美計擒之癸酉春紅賊亂震元守銅山督將士力戰拔黃斌卿於伍中往勦大破之丁父憂歸震元博通經史尤精識緯推測知崇禎十年以後數當陽九喟然曰只今便高臥已負半生閒因作負半菴杜門著述周延儒強之出不應壬午病卒震元讀書隨手評閱不下萬卷著書有二十餘種宋相譜編次二百餘卷

鄧漢

按列朝詩集漢字遠游新城人萬曆戊戌進士除浦江知縣調秀水召為河南道御史巡按雲南出為山東副使歷參政按察使以食都御史巡撫順天大啓乙丑為逆奄所惡遣戍貴州崇禎初赦還未及用而卒有留夷館南中紅泉諸集其自序謂十歲喜誦唐人詩年十五始學詩生長寒素衣食多累三十成進士州縣為勞徵拜御史需次邸舍朝請多暇謝絕人徒悉取毛詩楚騷下逮三唐細閱而深思之神明默識霍然悟汗乃知我明諸公之學古人都在形骸之外去之所以更遠王李既廢流派各別在警奔逐實繁有徒孝豐吳稼壻詞林老宿見楚人而大悅盡棄其學而學焉予聞聲呵禁乃止遠游當王李未流楚人崛起之會欲箴砭兩家之病而集其所長其志則大矣旋觀其詩體貌豐鋤音節繁會長篇極意鋪陳而持擇未得其領要今體取材尖巧而劍搜未脫其皮毛可與掉鞅時流或未能方軌先正也

葉憲祖

按浙江通志憲祖字美度餘姚人萬曆乙未進士入爲工部主事逆奄建祠長安街憲祖笑謂同官曰此天子走辟雍道也土偶豈能起立乎逆奄聞之大怒吾乃爲郎所諸制籍崇禎間累官至廣西按察使與孫鑑讀書鑑文師法王槐野憲祖師法牟州兩人各自爲家而議論則水乳憲祖長於填詞古淡本色街談巷語亦化神奇吳炳袁令昭同家名手皆從其指授爲弟子

鄭引驥

按列朝詩集引驥字閑孟嘉定人與李長蘅偕爲博士弟子少長於長蘅博聞強記爲長蘅所推而閑孟心服長蘅之才與其爲人隨肩接席若形影不相舍

因長蘅以交於余亦猶是也性嗜酒好長夜之飲每飲輒酒面濡髮酩酊無所知試於有司扶殘醉以往咯嘔委頓已而臥筆伸紙據几疾書文彩爛然不自知宿醒之去體也數踏省門不見收發縱酒自放久之得酒病不復能沾脣注視杯罍嗚咽而已竟以此不起閑孟爲文章雄健好談經濟詩不屑今體專爲五言古詩兀界排蕩不規摹韓蘇而意象近之德州盧世淮德水督漕嘉定訪得其遺文屬有司刻之不果德水至今歎之嘉定多讀書汲古之士余所知者徐允祿字汝康以經學爲大師奮髯扼腕好談天下大計東事急余在左坊三千里寓書當唱大議亟勸主上南遷已已之役徐元玉爲忠言至計而于廷益不幸而中也其經奇如此襲方中字仲和翩翩佳公子能詩好事亦長蘅之友唐正雅字正叔長身玉立

博通經史好學深思之君子也諸子詩文皆不傳惜其氏名將泯泯於斯世也爲附著焉

開啓祥

按浙江通志啓祥字子將錢塘人綜博羣書工制舉業揮酒落筆其丹鉛甲乙落紙如飛命梨棗日行卷制義之有行卷自啓祥始嘗與吳郡李流芳入京師已及國門忽意不自得趨車徑返後屢以薦被徵堅辭不起晚學出世逢去來死生著有自娛齋稿

龔士驥

按列朝詩集士驥字季良義烏人崇禎戊辰進士知溧水縣卒官季良以辛酉舉於鄉余閱其閨中牘班駁多奇氣度衆取之撒棘知爲奇士恨相見晚也季良膂力絕人能挽百石弓軀幹豐偉與夫爲喘息汗下跳躍起距輕蹻少年弗如也家世烏傷爲宗汝霖故里習行陣束伍之法余方急東事爲縣官急才入朝以告董大理崇相崇相特疏薦之季良方下第策馬宵遁既舉進士有子領鄉舉被劾悒悒不得志之官遂發病縱酒狂呼時時拔劍砍地自負知醫不肯服藥而死

何白

按列朝詩集白字無咎永嘉人幼時爲郡小史龍君御爲郡司理異其才爲加冠集諸名士賦詩以醺之爲延譽於海內遂有盛名西遊酒泉南窮湘沅歸隱於梅嶼山中崇禎初年以老壽終無咎能書善畫有汲古閣集行世

任憲

按山西通志憲字竹東佐第三子幼善平仄好詩書

厭繁文書曰使吾得一民一士治之決不贖厥職以貽士林羞萬曆初以貢授鄉縣訓導上典學六事疏不報恥庠士咎實兄弟閱于齋作詩自責督悔謝過考正名宦鄉賢位次遷山陰教諭再遷大同教授因庠士丁鶴冒訟上官代丁自責倡建已故總兵周尚文郭琬忠烈祠旌節婦朱劉氏五人孝子趙榮貴一人與遼陽治兵何廷魁書指畫策略切中機宜遷慶府紀善歸里崇禎己巳元日自書桃符云多九十六歲少一百之四年夏果卒壽九十有六所著龍鍾草等見刻續垂棘編三晉語錄中

朱珏

按列朝詩集珏字比玉莆田人家世仕宦不屑從鄉里衣冠浮湛徵逐年三十負笈入太學游金陵走吳越徧交其賢士大夫初從人扇頭見程孟陽荔枝酒歌行求七載始識孟陽遂以兄事之因孟陽以交余長身玉立神情軒舉開顏談笑不立崖岸其胸中涇渭井如也善八分書現撫夏承碑蒼老雄健骨格軒然畫出入二米仲圭子久不名一家而又泛愛施易不自以爲能事酒酣歌罷筆騰墨飛或即席賦詩或當筵染翰書意浹壁淋漓戲劇或醒而自謂無以加又或旦而忘其誰作也人以是多易而親之滯淫旅人默默不自得客死吳門其卒也孟陽撫之乃瞑而受舍余與孟陽欲留葬虞山不果返葬後十餘年金陵顧夢游入閩哭其墓乞余爲文伐石以表之比玉爲詩才情爛熳信腕疾書不加持擇詩成亦不留葉余取其得荔枝辭一首以爲近古人諷諭之遺今其遺稿刻于金陵者其里人所掇拾非比玉意也

費尚伊

按安陸府志尚伊字國聘沔陽人萬曆丁丑進士選翰林院庶吉士改兵科給事中為諫官森挺不少軌誦適見太宰趙公錦入朝步履偃蹇公疏為老當知退論者斥公輕詆以年例出為四川僉事又兵備漢南經紀鹽馬擢摘其奸禦其災哺其飢不遺力也未幾謫靈璧丞量移紹州推官丁外艱歸堅臥林園絕意仕進者五十餘年其為詩文非兩漢三唐不道性喜賓客開尊賦詩陶然畫典沔城風物遊賞無虛日李宗伯本寧序公集稱其廣庶子之規模約廷尉之氾濫為知言云沔自童內方陳玉叔後即推公著作之林所著有市隱園集

秦鍾震

按福建通志鍾震字伯起晉江人萬曆丁未進士博極羣書工古文詞清逸流麗有才子之目官知府以目疾歸歌咏自娛嘗於山水絲竹間失口成篇既盲猶作草書問字者屢滿或時與人賭墅不差尺寸世咸奇之卒年八十餘

何喬遠

按明外史本傳喬遠字穉孝晉江人萬曆十四年進士除刑部主事歷禮部儀制郎中神宗欲封皇長子為王喬遠力爭不可同官陳泰來等言事被謫抗疏救之後亂朝鮮石星許之封貢倭益猖獗二十二年春朝鮮使臣金晬泣言李如松與賊議和禁國人不得抗拒致束手受刃者六萬餘人沈惟敬交通倭賊許以和親而欺罔中朝詭稱乞降悔罪其詞多辱國喬遠即據以上聞因進累朝駁倭故事請特降勅止

封母下樞曹使得寢閣帝見疏頗心動而星堅持己說疏竟不行先是肅王薨其子請襲尚書羅萬化謂當俟喪終中貴納其賄為道地喬遠固拒遂為所怨會部疏誤遣喬遠名當停俸中貴乘機激帝怒坐謫廣西布政司經歷以事歸里居二十餘年中外交薦並不光宗立召為光祿少卿移太僕時還陽已失王化貞駐廣寧妄稱當戰中朝頗惑之喬遠畫守禦策力言不宜輕舉無何廣寧竟棄如喬遠言天啓二年進左通政徐鴻儒亂山東官軍屢奏捷喬遠請因戰勝之威急赦脅從與之更始帝褒納焉鄒元標之建首善書院也給事中朱童蒙等劾之喬遠上言書院上梁文實出臣手義當并罷語多侵童蒙童蒙輩大恨其多進光祿卿明年得疾將告歸適用為通政使遂出國門引疾葉向高素重喬遠親出郊挽之喬遠不可五疏力辭乃詔以戶部右侍郎致仕崇禎二年起南京工部右侍郎給事中盧兆龍劾其衰庸尋自引去喬遠性行醇實博覽好著書輯明十三朝遺事為名山藏又纂圖書百五十卷頗行於世兄喬遷舉人大理評事子九雲與喬遷孫運亮皆崇禎十六年進士九雲官庶吉士運亮海康知縣

陳懿典

按浙江通志懿典字孟常秀水人萬曆中會試第二選庶常授編修博洽今古著作巨麗一時高文典冊多出其手與修實錄分撰同姓諸王傳時神宗皇儲未建忽傳二王並封之諭懿典具疏引祖訓並未育元子可並封之例指斥宮闈歸咎宰輔又遺書首揆責其不能匡救後並封中止崇禎中晉詹事府少詹

所著有史隱齋集論孟賁義左陸紀略聖政聖學諸書

宗名世

按揚州府志名世字良弼興化籍江都人弱冠試輒高等中萬曆戊子鄉試己丑成進士初任紹興教授行至夢筆橋夜泊夢江淹以綠筆三授之曰俾爾三世享文名秩滿陞廣平府肥鄉知縣以簡領俗邑人德之轉國子監博士進監丞陞工部營繕司主事丁繼母劉喪哀毀過甚服闋以病乞歸喜曰可重理邦水魚竿矣疾愈疏薦力辭不起年八十卒所著有發蒙史略一卷含香堂文集十卷

阮自華

按列朝詩集自華字堅之懷寧人萬曆戊戌進士除福州府推官大計坐謫累遷至戶部郎出知慶陽府再謫補邵武崇禎三年罷歸未幾卒父鶴事永陵總督征倭失事下獄死堅之起孤生覆巢完卵感慨力學少為歌詩多疾謾具禍魁壘用壯之思為人跌宕疎放好從學佛者游嗜酒為長夜之飲為理官時直指行部扶醉入謁甫下拜略嘔狼籍噴污直指衫袖遂致露章晚為郡守不視吏事賓客滿堂分簡賦詩遨遊山水間稱風流太守嘗大會詞客於凌霄臺推屠長卿為祭酒絲竹殷地列炬熏天宴集之盛傳播海內復為直指所糾而罷堅之記誦輿博摺撫富有漢魏樂府至杜李古詩無不摹擬自謂超于鱗而上之其實無以相遠也七言古今詩襲績纂組乏抑揚頓挫之致覽燕中都邑之勝自三殿迄虎園約房作七言今體詩百篇君子尚其志焉童卯稱詩以故人

釋子得見於王元美諸公僕然介立不屑爲附庸諸公亦無稱焉故其詩名不著居恆語其從孫集之詩豈將流貴人時文名士所能爲以子之才不思單出獨樹自致千古日與某某相唱酬波流汨沒吾悲其詩之日下也言已輒涕泗洩瀾不能自止蓋其苦心持擇厚自期待如此

按安慶府志自華字堅之大中丞鶚季子天資穎異力學嗜古舉萬曆戊戌進士初授福州司李再任饒州丁內艱服闋轉戶部郎權稅德州著廉幹聲痛父中丞鶚以呈誤奪官伏闕陳情卒得昭雪予祭葬晉慶陽守其郡爲空同李夢陽桑梓乃築室祀空同因作懷賢賦以寓仰止崇禎初再起郤武興利剔蠹不遺餘力無何以病乞休日與海門諸子修禊觴咏以娛晚節卒年七十有七所著有霧靈詩集行世自華博極羣書主盟騷雅東海屠隆負人倫鑑作四君子詩馮夢禎朱長春虞淳熙其一則自華也尤善草書人皆藏弄爲寶

劉策

按濟南府志策字愚靖武定州人萬曆辛丑進士任孟津令平黃河大盜補新城平徭蘇里權御史正科場之弊昭楚宗之寃歷陞晉陽開府時蒲坂妖蓮蠢動監司議勦策不從乃傳檄曰枯萬骨以幸成功吾勿忍也妖民遂解散去尋總督趙遠被譴歸里鍵戶讀書不異寒素所著有祥刑錄尚友錄六卿考訂正紀年五經字訓管規複字刑書弋輔臣考等書

俞彥

按江寧府志彥字仲茅上元人萬曆辛丑進士性至

孝甫登第即疏乞終養恬修承志者十六年人以爲難母終授兵部車駕司主事累官光祿寺少卿彥長材玩世談笑風流其居官也事至風掃雲斷無所留滯而性高亢不能以啗嘗諸新進故屢起屢蹙然不屑所居客園水石幽勝感憤時事每託詠諸書擬古樂府以寓憂憫臨終書一絕云秋月正中看盡夜野雲散去落何山擲筆而逝

俞琬綸

按江南通志琬綸字君宣吳縣人萬曆癸丑進士任西安令風流文采掩映一時但放誕不能居官臺憲劾之云聊有晉人風味絕無漢官威儀琬綸笑曰云絕無可稱知已云聊有不無遺憾著書自娛臨地最勝

陳元素

按蘇州府志元素字古白郡人萬曆丙午鄉試卷已擬解首同鄉司提調者以小嫌厄之竟落去元素以義命自安終未嘗言及見阻者一時名雋多執經受業與俞琬綸稱莫逆交詩文亦各自名家書法歐陽率更精楷入神兼善書蘭人爭購之歿後門人私諡曰貞文

來復

按列朝詩集復字陽伯三原人萬曆丙辰進士兵部郎儼然之子也爲詩文敏捷如風爲人重氣好客泛交道廣有聲薦紳間起家戶部郎歷官布政使備兵揚州歸田病卒陽伯性通慧詩文書畫之外琴棋劍器百工伎藝無不通曉惟未習女紅刺繡至吳門學之旬日吳中女紅皆歎賞焉同時華州郭宗昌字引

伯博聞多能與陽伯略相似皆三秦之異人吳越間多秀才未有其比余於引伯之奇知其什五恨未見陽伯也陽伯有詩集十餘卷能詩而不能工亦多能累之也

王嗣輿

按寧波府志嗣輿字右仲號于越領萬曆庚子鄉薦教授宣平陞宿遷知縣改永福擢涪州知州會與監司忤罷歸輿生而雋異早有文名爲余太常寅所賞識及長徧覽經史尤嗜杜少陵詩常夢輿之把臂共吟後以治事至錦官城過草堂謁少陵遺像恍然如夢中及里居遂注其詩曰杜臆云

舒曰敬

按江西通志曰敬號礪石南昌人萬曆壬辰進士授太興知縣六閱月城修政舉以杖斃巨富張耀忤太守吳秀意中之於釐使士民冤之敬歸未幾左遷徽州府儒學教授致仕講藝主盟如紫陽山白鹿洞滕王閣杏花樓及湖上虎丘諸社皆臨以講席一時名公鉅卿多出其門後奏薦凡三十一大崇禎間尚書沈演復專疏薦用未赴山居幾五十年貧約如諸生所著有隻立軒前集續集詩集四書易經講意詩經臆解諸書年七十有九

陸寶

按寧波府志寶字敬身父懋龍登萬曆五年進士知合肥縣以治行高等入爲兵科給事中終於湖廣參政寶崇禎初由太學生授中書舍人數年歸雅好爲詩嘗慕宋陸務觀詩盈萬首欲效之於是坐臥飲食皆不廢吟至年開八表果盈其數乃刲羊承盛酒饌

祭告三代以來及明時諸作者與友人歡飲而罷其風致如此所刊有霜鏡辟塵悟香諸集藏於家同里周應辰號綠莊亦善詩嘗與寶及太僕陳朝輔選甫東詩括搜羅凡五百餘家刊行於世

王象春

按列朝詩集象春字季木新城人萬曆庚戌進士第二人與茗上韓求仲名相次也季木每歎詫奈何復有人壓我其語頗爲時所傳而求仲科場議大起遂以季木爲計己黨人用壬子北試移師攻季木牽連謫外稍遷南吏部考功郎季木雅負性氣剛腸疾惡扼腕抵掌抗論士大夫邪正黨論異同雖在郎署咸指目之以爲能人黨魁也卒用是敗歸田久之遂不起季木於詩文傲睨輩流無所推遷獨心折於文天瑞兩人學問皆以近代爲宗天瑞贈詩曰元美吾兼愛空同爾獨師其大略也歲庚申以哭臨集西關門下相與抵掌論文余爲極論近代詩文之流弊因切規之曰二兄讀古人之書而學今人之學胷中安身立命畢竟以今人爲本根以古人爲枝葉窠臼一成藏識日固井所讀古人之書胥化爲今人之俗學而已矣譬之堪輿家尋龍捉穴必有發脈處二兄之論詩文從古人何者發脈乎抑亦但從空同元美發脈乎季木搖然不應天瑞曰善哉斯言姑舍是吾不能遽脫履以從也厥後論賦頗辨駁元美皆替于雲之語蓋亦自余發之季木退而深惟未嘗不是吾言也季木尤以詩自負才氣奔軼時有齊氣抑揚墜抗未中聲律余嘗戲論之天瑞如魔波旬具諸天相能與帝釋戰鬪遇佛出世不免愁宮殿震壞季木則如西

域波羅門教邪師外道自有門庭終難皈依正法季木問山亭詩不下數千篇而余錄之斤斤者誠不忍以千古之事累亡友於無窮也

欽定古今圖書集成理學彙編文學典

第一百十六卷目錄

文學名家列傳一百四

明二十六

文鳳翔

潘一桂

朱表杪

王一中

陳邦瞻

蕭士璋

金光弼

鄒匡明

曾大奇

文德劉捷
歐陽友奇

李邦樸

于奕正

劉汝教

李鳳翔

吳鼎芳

陸明輔

陳組綬

吳鍾繼

岳虞繼

商家梅

劉榮嗣

顧大韶

黃圖昇

范弘嗣

鹿化麟

馬應乾

陳銑

傅占衡

王承之

郭宗昌

魏冲

葛一龍

徐穎

張應鼎

徐英

王志慶

倪長珩

林奎

越其杰

楊文聰

朱謀放

歸昌世

吳麟玉

孫會楠

胡震亨

羅明祖

姚康

田有年

沈溥

黃鼎臣

王一翥

孫國教

梅守箕

梅朗中

俞綬

梅巨儒

茅元儀

于鑒之

何允泓

徐千

沈建

徐波

董斯張

劉斯陞

郭連

劉大猷

黃見泰

蘇育

沈捷

沈士鑑

李于堅

王醇

吳子玉

吳統持

支如增

沈中柱

陳蓋謨

朱朴

王萬祺

張民表

阮漢閣

趙日躋

張昉

張炳璿

吳兆

吳夢暘

于嘉

柯日東

江大虬

裴章美

王弘學

陳鴻

沈野

方錄

余慶

陳衍

陳鳴鶴

康彥登

張燮

梁爾升

周如埏

江仲魚

文學典第一百十六卷

文學名家列傳一百四

明二十六

文翔鳳

按列朝詩集翔鳳字天瑞三水人萬曆庚戌進士除萊陽知縣調伊縣遷南京吏部主事以副使提學山西入為光祿少卿不赴卒於家天瑞父在茲舉萬曆甲戌進士以程文奇異為禮官所糾遂不復仕作梅花詩至萬五千言講德摘詞以奧古為宗天瑞繼承家學彌益演迤庚戌殊卷房考雷簡討思需鉤稽投落以青筆乙其處始就句讀其論學以事天為極則力排西來之教著太微以翼易謂太元潛虛未窺其藩余將行攜其藁過邸舍再拜付余語人曰太微南矣余媿不能為桓譚也以辭賦為崑門絕學覃思腐毫必欲追配古人嘗稱曰屈宋枚馬生知之聖也神至於不可知揚學知之聖也大而化矣班張左大賢也充實有光輝而未果化潘陸以後充實而美矣光輝乎何居余欲建子雲以為師友太冲與之為朋而

未之逮也作金陵六賦以當京都蓋其大志如此其爲詩離奇昇兀不經繩削馳騁其才力可與唐之劉父馬異角奇關險峻作嘉蓮詩七言今體至四百餘首亦古未有也天瑞曰哲長身秀眉飄飄風神標格如世所圖畫文昌者其爲人忠孝誠敬開明豈弟迥然非世之君子也初第時與余辨論佛學數日夜不寢食曰子姑無困我庚申冬以國喪會闕門極論近代詩文俗學祈其改而從古天瑞告王季木曰虞山兄再困我矣天瑞與余不爲苟同如此然而如天瑞之文賦半龍負穎波瀾詭譎其學淵博千古真如貫珠其筆力雄健一言可以扛鼎世之人或驚怖如河漢或引繩爲批格要不能不謂之異人不能不謂之才子也文中子曰揚子雲古之振奇人也余於天瑞亦云

潘一桂
按列朝詩集一桂字無隱一字木公吳江人年未三十有賦數十篇卜居京口覽江山之勝與友人錢元密緯以辭賦相餽餚作東征昌言諸賦爲時所稱東遊泰山謁孔林作東遊詩南陽朱邸好辭賦延請四方賓客起高明樓擬於鴈池免園幣聘再至乃往授簡賦詩雍容應教有趙康王禮謝榛鄭若庸之遺風焉居留一月謝不能曳裾王門稱疾辭歸取道襄陽禮元岳經黃鶴樓浩然東歸未幾病卒年四十有五無隱詩多弘麗今集爲史弱翁所定多取其庸立者賦則爲西極文太青所推太青以揚馬自負目無一世見無隱諸賦曰我心折氣慙矣無隱之可傳者其在斯乎

朱表杪 知
按山西通志表杪字竹溪陽曲榮靖王曾孫好讀秦漢以上諸書工詩賦善草書以義獻爲宗識者重之其少子知齋善繼父志東髮習聲律三十而詩成五十而名益著能世其家學郡守至輒扁旌之

王一中
按處州府志一中字石門麗水人從幼孝敬卯角能文爲臨川湯若士所器重中丁未進士歷三邑皆以清廉著在古田日拔陳弘德於園後薦賢書閩人至今以爲美談考選授廣西道御史疏罷內市糾保姆客氏權璫魏忠賢巡按山東蕩平妖寇徐鴻儒等陞京卿首推操江都御史忠賢風忿即於會推降旨削奪使十餘人相隨於路見其行李蕭條一二僮僕身衣藍樓蓬嗟嘆而去居家十餘載御物溫雅雖對斯養卒如嚴大賓尤喜獎引後進抑抑忘倦述五經輯郡乘當道屢薦不起日以道德性命之學與諸子相研究深於易凡天文地理諸子百家以至邊國聘壽之史稗官雜說靡不探討即雪寒霜凍手不釋卷再起光祿召對稱旨以不附時要調南光祿屢疏乞休上勉留焉年七十有二祀鄉賢名宦所著有瑞芝堂集經書疏解東巡疏草祿勳草柱下焚餘諸書

陳邦瞻
按列朝詩集邦瞻字德遠高安人萬曆戊戌進士除南評事轉兵吏二部歷浙江福建河南參政按布兩使以右副都御史巡撫廣西以兵部右侍郎總督兩廣入爲工部兵部侍郎改吏部左侍郎德遠留心問學於經史之學殊有原本撰宋元史紀事本末爲史

家所稱搜訪高楊張徐之集刻而傳之使淫哇靡曼之後復聞正始之音其風尚可思也

蕭士璋 士瑋
按吉安府志士璋字伯玉號三義泰和人萬曆壬子舉於鄉丙辰成進士壬戌殿試授行人司行人崇禎壬申改南大理寺評事遷禮部主事江寧諸僧習爲浮競詩酒執務轉相慕效璋至一繩以法瑋風度簡遠爲園於柳溪選石置亭極林泉之勝閉戶著書未嘗一接雜賓錢宗伯謙益謂瑋無俗情無俗務無俗交無俗文無俗詩庶幾彷彿其爲人所著有春浮園集五卷目錄若干卷行世弟士瑋士珞皆好學能文

金光弼
按江西通志光弼字右辰永新人著有功臣傳金竺山房詩集

鄒匡明
按江西通志匡明字子尹安福人德溥子所著有法雲翰音蟬吟詩

曾大奇 文德 劉捷
按吉安府志大奇字端甫泰和人號需堂博學通經史百家嘗題座右一詩云鏡裏蕭蕭白髮疎功名那復到樵漁從今但築祁年觀更讀人間未見書其好學不倦如此所著治平言通覽諸編藏於家子文饒字堯臣儀觀頎偉曾大磊落好獎拔士類所居車馬填溢爲文如出水芙蓉自然可愛有浣花居小品行世其時如劉捷歐陽友奇皆與齊名

李邦樑

按處州府志邦樑字紫卿縉雲人瑰瑋曠達類陳同甫讀書鄧章句貴得大意所在博洽今古好爲三都兩京之學弟子問奇不能難登茂薦後猶苦志下帷卒不遇授台州府學訓導以豆腐賦爲督學鄭嘉生鑒賞成莫逆交台人陳兩輝素號博物遇樑自詡服轉寧州教諭又轉九江府學教授歸行李蕭然樂道自得其詩宗李杜字法鍾王人至今傳式之所著有積石山房等集大易剖老子元解捕虎奇門行世

于奕正

按畿輔通志奕正初名繼魯字司直宛平人生而峻潔喜讀書性孝友喪父讓財於兄弟獨居荒園治舉子業恥勦竊爲文章在諸生中嶽嶽無所讓其所交遊皆當世名人以故多畏惡訕笑之者奕正工爲詩歌好遊名山嘗言秋山嚴淨濤時知有道高人每於霜清木老時驅驢而往壑巖絕巘數百里間無不周覽過斷碑必披荆剔蘚以識之或攀枯蘿躡危石踰其絕頂慨然賦詩有超世之概當世名人來輦下者皆知有子生與楚譚元春劉侗尤稱友善兩君來京師必客其園與侗著帝京景物略崇禎乙亥偕侗取道秣陵徧歷名勝將之楚會元春止之遂歸而疾作卒於秣陵旅舍初于生夢與故人郭聖樸舟入於壑聖樸先是客死秣陵者既而夢歸見手滌鼎三指鼎耳間其環母答兒無環矣寤告友人曰三鼎士之祭母言非兆耶死願擇秣陵一片地與聖樸同葬焉既卒侗曰達哉于生雖然死歸附於壑禮也遂護其喪歸楊日補顧與治刻其遺詩數十章所著金石志模草詩與景物略行於世于生南行將著南京景物

略竟以元春不果惜哉子藻能世其業

劉汝教

按畿輔通志汝教唐縣人號育山樵子幼機穎長乃靜晦于世澹然獨苦心於文自謂播接兩漢制剛先泰以成吾之磊落而後已瓊瑰滿心筆扛大塊句露天根大吐古人之奇而世人不好七試七黜既而歎曰匪文之厄實命之塞乃收風雲而寂寥於英氣之餘外形骸而縱浪於大化之內晚嗜莊騷日理詩酒以爲天遊之具所著有育樵吟五卷

李鳳翔

按畿輔通志鳳翔字伯鳳東鹿人工帖括宗羅唐歸胡諸大家聲名藉甚數奇不遇力學四十年博覽羣書尤究心資治通鑑性理大全二書人間之背誦以應所著有四書釋義日新集

吳鼎芳

按列朝詩集鼎芳字凝父吳人世居西洞庭爲詩蕭閒簡遠有出塵之致與范東生刻意宗唐刊落凡近有披襟倡和集行世一時肥皮厚肉取青妃白之倫望之人人自遠也嘗與東生及子遊苕溪泛碧浪湖入夾山溪往返二十日風清月白苦吟清嘯僅得七言絕句一首其矜重自愛如此後雜染從釋氏法爲高僧以終凝父與葛震甫稱詩於兩洞庭皆能破除俗調自豎眉目震甫晚自信不爲顛折入於鍾譚而凝父亭亭落落迥然塵壘之外震甫自負才大以爲入佛入魔無所不可竟不免墮修羅藕絲中凝父修聲聞辟支果雖復根器小劣後五百年終不落野狐外道也

陸明輔

按蘇州府志明輔字伯相吳縣人居包山父鵬富好行義以詩文自娛有白浮集明輔博學攻古文辭落拓不事生產初困役粟盡磨晷日晷未炊猶手不釋卷所著曰左球史琳龍飛十紀明時玉韻明輔歿二子幼而貧一女守貞不嫁勉刻父槩阿集行世

陳組綬

按武進縣志組綬字伯玉崇禎辛酉解元甲戌進士授兵部職方主事勤勞盡職以其暇著職方圖凡京省都邑九邊四塞山川險阻錢賦出入關軍機要害者悉載焉丙子奉命典試山東役竣星趨赴部善兵畫餉倍於平時積勞成疾臨終呼曰吾此身不死疆場而死牀第乎簡篋猶見伐謀制勝奏革生平喜臨池乞書者屢至所著有五經副墨孝苑編史飭齋詩文諸書

吳鍾繼

按江南通志鍾繼字櫛樸武進人幼以文行著受業顧憲成從高攀龍悟治心養性之要門下士數百人江陰李應昇爲最應昇擢璫禍被逮過郡交遊閉戶不敢通鍾繼獨迎至館談論如平生以季子訂姻年五十七始序貢得選光州學正崇禎癸酉中河南解元甲戌成進士初令長興分較浙閩得錢肅業馮文煒吳夢白諸名士以催科政拙不善事上官被謫家居集同志講學尋補紹興府幕移桂林府推官未幾卒所著有周易卦說大學衍義寶舟語錄十願齋文集數十卷

岳虞衡

按江南通志虞翻字壽徵武進人崇禎辛未進士知杭州有冰心鐵面之謠陞江西按察家居杜門自題其齋曰湖山貧太守惟以著書為事垂二十餘年晚尤好易究天人理數之學有周易感七十三卷春秋平義五十四卷書成之日無疾終

商家梅

按列朝詩集家梅字孟和閩縣人萬曆末年遊金陵與鍾伯敬交好伯敬舉進士從之入燕馬仲良樞關許聖備仲良之吳門其交於余也以鍾馬而其游吳中也最數且久居閩之日與游吳相半則以余故也孟和少為詩饒有才調已而從伯敬游一變為幽閒蕭寂不多讀書亦不事汲古鐵心役腎取給腹荷低眉俯躬目笑手語坐而書空睡而夢靈呻吟咳唾無往非詩殆古之詩人所謂苦吟者也崇禎丙子自閩入吳馮爾廣備兵東倉好其詩而刻之明年余被急徵孟和力不能從而又不忍余之銀鐙以行也幽憂發病死妻江之逆旅爾廣庀喪事返葬焉余嘗與孟和論詩舉歐陽子論梅聖俞之言以為聖俞之詩解非一體不若唐諸子為詩人者僻固而狹隘也夫僻固而狹隘是可以為詩人乎雖然惟僻固則心思不亂營神志專一而可以屏營現之外遊惟狹隘則見聞不奢取聰明陶汰而可以獨意象之旁誘今之人不安於僻固狹隘而嗒然自鴛窮大而失其居博采而不領其要今之所以不及唐人者豈非懲歐陽之云而反失之乎孟和俯而深思喟然而長嘆曰善哉子之教我也我今而知所以自處矣我寧規規封己為僻固狹隘之唐人不願為不僻固不狹隘之今人

也子幸以斯言叙我詩百世而下有指而目之者曰此有明之世一僻固狹隘之詩人也視歐陽子之稱聖俞者不尤有餘榮矣乎余既諾孟和之請而未及為今錄其遺詩追憶平時往復之語聊舉其緒言以慰孟和於地下井以誌於世之知詩者

劉榮嗣

按列朝詩集榮嗣字敬仲曲周人萬曆丙辰進士除戶部主事改吏部歷稽勳郎中出為山東參政歷布政司入為光祿寺卿順天府尹拜戶部右侍郎以工部尚書總理河道運道潰決起宿遷至徐別鑿新河分黃水注其中以通漕運三年積用勿成下獄論死崇禎戊寅獄未解而卒敬仲為人淹雅讀書好古敦篤友誼河渠之任本非所長門客游士創挽黃之議耗沒金錢敬仲用是坐罪父子俱斃用違其才良可痛也敬仲為詩用意冲遠自謂迴出時流德州盧德水篤好而深解之句詮字注以為獨絕唐人之鑄買島宋人之宗涪州無以遇也余在講室與敬仲游處踰年敬仲取往復次韻之作都為一集名曰錢劉唱和詩以貽德水又屬余為叙其全集敬仲生長北方而不習北食嗅葱蒜之氣輒喀嚔不止詩操南音不類河北俗父亦可異也

顧大部

按蘇州府志大部字仲恭與兄大章舉生大章舉進士奉使休沐顏面膚腴大韶老於諸生頭蓬不櫛衣垢不澣悠悠忽忽每引鏡自說曰顧仲恭乃如許少治詩義專門名家長益肆力於六經諸史百家之書而其所研鑽者詩經三禮莊子其著論多人所未發

者其論經學於近代少可惟推武林卓爾康十五國風論以為通儒爾康勒大部著書垂後大韶曰春秋以前作者之事備矣雖有聖人但述而不作宋元以來述者之事備矣雖有志士但當誦而不述慈谿馮元慶按部修謁請所著書亦以斯言謝焉晚年欲竊比於程大昌演繁露王伯厚困學紀聞今所傳炳燭齋隨筆是也

黃圖昇

按蒲城縣志圖昇字孟起御史珰之裔孫負奇才每讀書數行俱下詩文駸駸漢魏以上萬曆壬子以春秋中湖廣鄉試第一人既獲傳遂邀遊吳越禮南嶽謁夢嶺凡山水奇勝無不搜討所結納皆天下俊傑己未春開擬元以觸總裁忌改副壬戌復擬元以用佛經字改副元授工部主事上疏辭職有墨綬更新如欲富貴能依舊不知貧乏之句尋授黃安諭又有聯云不避疎狂招物議婉言文字占時名甲子聘黔關分試檢元胡允敬餘所錄皆知名士先是祖御史珰以都勻苗亂監軍進討手植叢桂於黔署公試事竣摩碑認字展拜流連因築御史臺有題云當年牙補驚黔首此日文星始夜郎丁卯以憂歸壬申補安鄭論後陞北直大名縣知縣既抵任惟與諸名人質論經史詩酒相勞不屑屑於簿書未幾遂致政歸崇禎己卯以疾終所著有洗塵篇濯纓館十刻孟起常談諸書行世

范弘嗣

按山西通志弘嗣字耀昆洪洞人崇禎間貢士博極羣書尤究心理學謂做人必從五倫做起方是入手

真工夫教授生徒創開南原一帶文風出其門者如張鵬起申嘉言俱爲名臣萬曆戊申李維楨總憲督陽聘修山西通志崇禎戊辰授德州判德爲九省通衢漕運孔道弘嗣處之裕如又白蔣令誤謫之冤鹽院驗思恂兵道馮任糧道胡一龍交章互薦政事之暇不廢吟咏乘輿登岱詩四首濟南劉勅採入俗史中適都門戒嚴奉檄解米抵京偏實因獻防禦四策蒙嘉納明年代覲以流寇焚劫其鄉遂告歸與絳州辛全等日講理學未幾有保舉之典京官疏薦奉旨赴部抗疏辭歸閉戶著述訓教子孫云起雲稱其博比用修文比弁州詩比獻吉行比衡山退比白沙云所著仕國人文邑鬱草長生箋做人鏡睡餘南原塾記晉國垂棘宗聖諸聰聖志直聖志方公百政記晉書續雅四子祕藏藏毛詩補亡等書行世

鹿化麟

按畿輔通志化麟字石卿定典人善繼子生有風慧登辛酉榜第一未給諫致薦其學行應聘堅辭不就善繼丙子殉難化麟徒跣請卹以哀毀及所著有北海亭集八卷

馬應乾

按畿輔通志應乾字健甫金吾衛指揮使永之子古樸開爽絕去脂韋掌衛數年清苦不異寒士老而困甚性嗜書於天文曆算尤精詩文皆成一家言所著有釋典叢錄四卷詩文數卷

陳銑

按貴州通志銑前衛千戶儀度修整博覽文翰多積奇書以自娛尤好吟咏有醉鄉詩集

傅占衡

按江西通志占衡字平叔臨川人父太常卿家居頗以文史自娛衡少有異秉涉獵諸家經目不忘性淡漠恥事徵逐貫串古今辨核詳博爲古今詩歌諸體理詣幽通骨體芳妍奉父山中謝絕一切有謝舉羽吳清翁之風焉所著漢書撫言編年國策頗得史家之要嘗依郡志作臨川記三十卷有湘帆堂集三十六卷

王承之

按陝西通志承之字季安華州人與郭引伯同舉皆不就爲人慷慨有大志博學工詩賦雅好賓客每對客論文析理惟恐言之不盡丰度清淑望若神仙著有洞詞名世語水陽秋華辯諸書行於世

郭宗昌

按陝西通志宗昌字引伯華州人崇禎間應召入都籍紳文雅如宗伯王鐸錢謙益皆樂與交以不屑逢時歸家著書海內重之爲人倜儻磊落美鬚髯能博物工書法秉禮正俗士大夫家多宗之擬之郭有道云

魏冲

按列朝詩集冲字叔子與余同研席少相優也生而丰姿玉立嘗覽鏡自笑曰有美如陳平而長貧賤者乎爲舉子業與其兄浣初仲雪齊名叔子尤爲雄駿仲雪舉進士負時名叔子尚試童子科從江上繆西溪游西溪以爲當出我上使其子結姻好焉年三十餘始舉於鄉再上公車貧不能治裝遇盜奪釜鬲於途從一二貧交乞貸以往迄不使其兄知也親視里

中兄以爲糞土狗馬惟不得踐而踏之晝夜呼憤思射策甲科以發舒志氣崇禎庚辰復下第將就教職引鏡自歎曰如此人戴老廣文紗帽他時何面目復對此鏡乎歎歎慨歎發病而卒同舍王生夢鼎爲視含殮扶其柩以歸營吉壤以葬焉叔子垂髫即能詩長肆力於時文不能改比典間一命筆濯濯無俗調亦不復存稿余姑錄其二詩以叔子存其詩也異時將以二詩存叔子矣可歎也

葛一龍

按列朝詩集一龍字震甫吳之洞庭人山中多富室習爲行賈而震甫以讀書好古盡破其產入貨爲郎冀得一命以慰其母久次選人困於無資地不能自出吳橋范質公典選識其名異而問之曰得非吳下詩人葛震甫人呼爲葛髯者耶召之及塔舊髯應喏質公目而笑曰是矣乃得就選除雲南布政司理問及之官詳視緩步盤辟爲體頌上官皆目笑之居無何謝病歸卒於崇禎庚辰年七十有四正嘉之際洞庭祭九達爲清綺之詞頗自異於文視諸賢以爲獨絕震甫聞而說之刊落剪刻欲追配之於百年之上已而年漸長筆漸放楚人譚友夏之流相與尊奉之浸淫徵逐時時降爲楚調人謂震甫之吟於楚猶昌穀之移於秦可爲一喟也余錄震甫詩力爲爬剔祇除其晚年之變調而震甫之本來面目宛然故在不獨爲震甫解嘲亦使吳之後賢知所以自樹云爾

徐穎

按列朝詩集穎字渭友改字果友海鹽人爲諸生以註誤逃於僧自楚歸入茅山爲道士久之復出遊江

南燕雜間好談兵以徐鴻客姚榮靖自許兵後入閩粵不知所終洞庭葛震甫稱其詩曰不多作不苟作不爲應酬之作

張應鼎

按江陰縣志應鼎字大玉少好擊劍發矢命中又善鼓琴列諸生有名崇禎末爲怨家所中視去即髡髮自名印頂頭陀其詩別成一家老著餘生集錢太史謙益稱其鮮麗清切得劍南句法

徐英

按福建通志英字振烈候官人少豪健以擔尚豐倉米爲業忽折節喜擊劍讀書自榜其門云門喜無題午目媿不識丁縉紳貴公子之徒爭異之遂日造其門贈以詩英岸然不屑也輒目之爲儒癖嘗有句云儒癖到門又好笑霸才題贈也堪驚丙戌冬忽不食狂病卒

王志慶

按蘇州府志志慶字與游臨亭少子年數歲即汎濫經傳略及于史大家集天啓丁卯舉於鄉五上公車不第甲戌歸語其友張采曰國步蹙矣可奈何出感事詩百首曰吾以告哀後其言皆驗會有詔舉賢良當事以名聞下有司徵辟以病辭遂暮東郊丙園作終老計號漢陰丈人作實告招隱生平癖好讀書方年少童試不利即發二十一史讀之尤耽凍水通鑑反覆凡四周常云教子弟者當先經傳次三史次莊列管韓諸子次韓柳諸集乃融液通鑑察治亂源流暨事理得失自有程限豈可曠等耶性孝友居喪哀毀終三年不御酒肉事兩兄篤敬終身無間崇禎末

有良民三十餘人罹御史網合邑稱冤志慶密白司李盡釋之三十人踵門泣拜初不自以爲力也壬午歲饑人相食每獨坐阻涕秋七月疽發背卒病亟致書張采曰病發膏梁在表治易病發覺鬱在裏治難可以知其感事告哀未嘗一日忘於心矣

倪長珩

按浙江通志長珩字伯屏崇禎中進士父望達性孝苦志讀書鄉舉稱真孝廉長珩制舉業爲海內法程聲籍甚茲仕蘇州司理善政舉累吳民至今德之後隱於禪

林奎

按福建通志奎字子野福清人崇禎癸未進士爲人侃侃負志節閩縣董應舉漳浦黃道周雲間夏允彝皆重之恆與握手慷慨談時事爲之嗟嘆而去初授海寧令計擒邑妖人李三能等民德之特創祠祀焉後全節死年四十有二著有居易堂詩集行世尤善草書

越其杰

按貴州通志其杰字卓凡貴陽人舉人個儻好奇工詩文兼善騎射天啓二年任夔州司馬值奢酋叛連陷郡邑攻圍成都其杰帥兵援之大破賊陞食事以詔歸致政歸崇禎間起蜀州兵備再起鳳陽監軍河南巡撫著有薊門白門橫梁屢非諸集

楊文驤

按貴州通志文驤字龍友貴陽人戊午舉人崇禎時爲兵部郎博學能詩文尤精於書畫雖片楮寸幅人爭寶之著有山水移等集刻崇禎八大家詩文應其

一也

朱謀敎

按江西通志謀敎字用莊明宗室授封鎮國中尉重封奉直大夫游習詩文書畫兼工篆隸著有閒閣稿城南草并註六書正詁周史籀文諸書敎賦性孝義初母喪遵父命從孝慈婚禮彈力甘旨服闋後方事合卷甲申闖變甫聞之慟愴幾絕食不入咽者逾月子統鉅中丙子經魁庚辰進士

歸昌世

按蘇州府志昌世字文休有光孫十歲能爲詩歌稍長有聲詞苑與李流芳王志堅稱三才子屢困諸生遂棄舉業發憤爲古文詞中年益放意於詩有和陶詩篇爲松圓山人所賞書法通晉唐更精墨竹風晴雨雪各盡其態時游酒人淋漓跌宕倚絃度曲韻味脩然小築村舍奉親以居時或科跣行驗有終焉之志書自集平生所作詩十卷又稊文百餘篇藏於家子維登崇禎癸酉舉人授官長興教諭少子莊字元公工詩文善書法書竹豪放不羈亦有名於時

吳麟玉

按浙江通志麟玉字雅貞秀水人少負才名放浪詩酒間家築小園栽竹萬竿構數椽隱居其中額爲琅玕社與雲間陳繼儒釋智炫唱和晚喜種梅調鶴自號滄雪翁有醉月軒閒吟草傳世

孫曾楠

按浙江通志曾楠字讓生平湖人諸生結廬秋徑庭栽梅竹人稱鐵庵先生日與幽人韻士飲酒賦詩雲間陳繼儒以家藏楊廉夫鐵冠鐵笛爲壽曰冠貯竹

葉酒留作梅花弄此處大不俗矣著梅間草竹哀吟
學陶集數種

胡震亨

按嘉興府志震亨字孝彥才識通敏於書無所不讀
為諸生時即以經濟自負中鄉榜名著海內數上公
車不遇就職為固城教諭以尚書授諸生大學士范
景文其及門士也陞知合肥縣理冤獄減耗羨改民
解以蘇困開水利以惠農皆有實政吏治之餘尤留
意輶鈴嘗與劉綬論兵老將心折時議舉震亨邊才
不果陞德州知州謝病不起崇禎之季寇擾中原上
論大僚及詞臣言職等各舉可任守令者一人侍郎
朱大典舉震亨可任知府補定州知州時師行絡繹
民苦兵甚於賊震亨撫緝有方供億不匱而民不擾
以城守功擢兵部職方司員外郎陳新甲在中樞震
亨將有所建置以新甲不協衆望乞骸歸生平藏書
萬卷日夕搜討凡祕冊僻本舊典佚事遺誤魚魯漫
漶不可句讀者無不補綴揚榷稱博物君子所著唐
詩統鑑海鹽圖經續文選文獻通考纂靖康資鑒錄
今海虞毛氏書多震亨所編定也

羅明祖

按福建通志明祖字宣明風負文名登辛未進士授
華亭令下車力革積弊一時強有力者領之曰是不
畏強禦者憂歸後補繁昌令尋以築城誣誤謫越藩
幕及署蕭山令又以不屈為中官所擠調襄陽時獻
寇流毒楚蜀間朝廷遣監軍中使領禁旅十萬協勦
將驍兵淫民不堪命明祖請禁於提督熊文燦不聽
繼上書閣部楊嗣昌竟罷歸疾卒所著詩文全集三

十卷及評書百卷行世

姚康

按江南通志康原名士晉字康伯後以字行桐城人
萬曆間諸生博通經術雅肆力於詩古文辭而所慕
效尤在弁州崇禎中有以賢良方正舉者謝不就史
可法鎮皖延為記室一時軍務多所商榷所著詩文
甚富惟太白劍二卷行世

田有年

按江南通志有年字孫若宿松人崇禎庚辰進士召
對稱旨督河工著績籌度幾務多所陳奏轉浙江驛
傳副使尋署景篆疏郵煩瑣獄暇召生童課藝刻
大觀集得人甚多入覲乞終養築清貽館與弟逢年
以詩文倡和南臺著制義毛詩箋號十三經纂註行
世

沈溥

按浙江通志溥字洪濟烏程人力學敦行所交盡海
內名流為詩文不事剽襲而與致灑然所著有蕪洲
集雪川淵錄以鄉舉選授蘇州府通判嘗上封事其
略曰養君德慎名器振兵威抑近習斥異端裁冗費
却貢獻決壅蔽皆切中時宜談者壯之

黃鼎臣

按廣東通志鼎臣字爾調永安人孝友敦行敬信宅
心登崇禎戊辰進士任江西新建縣慈惠練達洞識
如神徵輸一剔宿蠹鹽法馬政煥然改觀兩臺薦剡
交騰惜赴父難遇害未竟其用下筆萬言立就不加
點貲贈炎藝林云

王一著

按黃州府志一著字子雲黃岡貴公子也父追阜靖
節於中賜祭廕子雲不屑屑於任子官思以大用性
類嵇阮才亦與兩人相頡頏頃至崇禎庚午始舉於
鄉於時科名仕籍糞壤充帷故子雲視公車令為岐
路隱於廬山尋為綠林所圍麗篋典籍無遺者還寓
巴江閉門著述家益貧學益富文宗西漢詩本風騷
天下莫不知有王子雲也宦楚者必先訪王子雲子
雲一切以恢諧應之敬者愈為與人寤笑多危苦之
言君子知其忠孝憤懣致愛慕焉庶母老且瞽救水
必誠子雲屬纊之日郡邑贈賻邑人爭為斂葬道路
咸垂涕而紉墓在巴江里許詩文惜散逸不傳

孫國枚

按江寧府志國枚字伯觀原名國光拱辰子幼穎異
善屬文為大中丞周公乾教所重嘗游吳門至京口
遇老友錢次甫為盜所刦傾囊贈之卜澹冶二水間
置五一庵以貢特授中書舍人國枚書淫傳癖鑒賞
最精四方碑板法書寶京師者必先投國枚訂之居
金陵小館近廟市董公思白為大宗伯每過市必至
救寓中繙閱竟日一時動感之賢者如恭順吳公惟
英新樂劉公文炳都尉冉公典讓華公鴻圖皆禮賢
下士篤嗜詞翰咸以牛耳推國枚月供膏火費著燕
都遊覽志四十卷雞樹館詩文集讀書通藏書若干
卷乞假歸老年六十有八子宗岱亦能詩文投筆為
偏將軍晚年隱居賣藥有古人風

梅守箕

按宣城縣志守箕字季豹蒙石善飲喜結客為文千
百言援筆立就每用古文字作經義困諸生不第輒

取諸生業焚之益肆力古文辭它無所嗜每飲必醉醉必有作或不能書以口授他人書之當稿脫時狂呼大嘯旁若無人司成湯賓尹雅傲岸獨推服之曰與季豹游使吾神王又贈詩云坐上若無梅季豹也客他輩得猖狂其見重如此名著公卿間然負氣任俠恥干謁家貧能緩急人以故人爭異之殆古之狂士也卒年四十五著有居諸集子茲祚字乙生其先從叔繼芳字陵峰繼英字吉山繼勳字曜陽從兄守默字龍泉守德字宛溪守和字二水從子蕃祚字子馬台祚字泰符國祚字景靈指不勝屈要皆通脫稱俠善詩文各有專集王元美贈子馬云從誇荆地人玉不及梅家樹樹花蓋為諸梅競秀也

梅朗中

按宣城縣志朗中字朗三鼎祚孫也少學古能文章發先世藏書旁搜極覽擷為英華聲籍吳越間四方之士道宛陵者莫不過從極嘯為人溫厚謙抑喜交遊善詩文書畫風韻灑然所至卷軸殷繁徵索如市口哦手揮人人得意去因諸生不第而當路折節加禮邑大夫余鳳尤稱善海內如馮元鳳周鑄陳子龍諸賢咸亟推之嘗輒唐以前賦為賦紀五十卷編校垂成而卒聞者嘆曰玉樹摧矣年三十六所著有書帶圖集十六卷弟超中字季升從弟磊字杓司皆同時名士各著有詩稿並行於世子庚辛酉舉人

俞授

按宣城縣志授字去文號洞影壯謝諸生業篤志古學博覽遐搜隨所目涉輒筆採之久而成書盈數尺居宜之西邸有小園中為檼架先世所藏卷軸與己

所購典籍充其中顏之曰父書樓為詩古文詞不加點竄長於叙事得史漢法度求者踵接皆弗辭或意到則置几于園中花竹下徐步微吟著飲數杯立盡十餘紙泗州施端敬令范縣聘修邑乘逾年而返七十六卒著有洞影詩文集六十卷

梅巨儒

按宣城縣志巨儒字諛聞孝廉士學子生八月失怙五歲就外傳受書強記不忘年舞象補諸生試輒高等為藝林所推尋棄制舉業盡出藏書讀之乃上邇義軒下迄近代做司馬文正公通鑑目錄邵子皇極經世編年體博覽慎討舉要訂偽為史鑑大事錄一書又著左傳發明以正定諸家義例他撰述古文辭詩歌百餘卷所居環樹以梅吟嘯其中泊如也當其下帷精思則累杵碩築戶僅於隔通飲食每經時月或歲除家人陳設畢乃出事婦母尤極誠孝生平無疾言遠色雖戚戚復有過不加譴責嘗捐金為鄰人贖罪免其繫妻

茅元儀

按列朝詩集元儀字止生歸安人鹿門先生坤之孫繕部國縉之子少為孤童雄傑異常兒年十歲吳興大殷太守集議賑饑羣公囑囑莫敢應止生垂髫奮袖請盡傾困廩以賑國人太守歎異曰魯子敬不是過也止生好譚兵通知古今用兵方略及九邊阨塞要害口陳手畫歷歷如指掌東事急募古人毀家紓難慨然欲以有為高陽公督師以書生辟幕僚與策兵事皆得要領嘗出塞相視紅螺山七日不火食從者皆無人色止生自如也高陽謝事止生亦罷歸先

帝進位經進武備志且上言東西邊情閩粵疆事及兵食富強大計先帝命待詔翰林尋又以人言罷已之役高陽再出視師半夜一紙催出東便門僅隨二十四騎止生腰刀匹馬以從四城既復牒授副總兵治舟師略東江旋以兵譴下獄遣戍漳浦東事急急再請募死士勤王權臣惡之勒還不許蚤夜憤呼縱酒而卒止生自負經奇恃氣凌人語多誇大能知之者惟高陽與余而止生目中亦無餘子世所推名流正人深衷厚貌修飾邊幅眼光如豆寧足與論天下事哉止生為詩文才氣瀟灑搖筆數千言倚待立就而其大志之所存者則在乎籌進取論匡復畫地聚米決策制勝集中連篇累牘酒江傾海皆是物也今既已化為飛煙蕩為冷風矣顧欲刺一二有韻之言簾揚而藻飾之是豈止生之所以自命而亦豈余之所以知止生者哉

于鑒之

按列朝詩集鑒之字昭遠金壇人吾友贈太僕少卿中甫之子也中甫於余二十年以長折輩行與余友而昭遠與其弟鑒字御君皆執經事余中甫沒余再過金沙昭遠坐我書閣下琴書分列香茗郁然文采風流浮動於研席筆墨之間間出其歌詩烹金羹玉追琢其章知其深思汲古不為苟作者也中甫風義激發居部黨之首晚年坐黨論屈抑昭遠兄弟如二惠之競爽思一振起之而皆困於塲屋昭遠邑鬱呼憤嘿嘿不得志年才五十發病而死昭遠過虞山以雜感詩示余余讀之至萬事只如芳草暮一生常比落花時徘徊吟咀以為獨絕已而私與孟陽曰劉